

# NDỌ EYEN-ERỌŃ

Eriyarare 19:1-21

ỌYỌHỌ UKPEP-ŃKPỌ 464

Eke Mkp̄arawa

**IKỌ IBUOT:** “Enye onyũ enyene enyiĩ emi ewetde ke ọfọ̀ndem Esie ye ke ifuhi Esie ete, EDIDEM NDIDEM YE ỌBỌŃ MBỌŃ” (Eriyarare 19:16).

## Hallelujah Chorus

Ke ini John Edima okodude ke Isuo Patmos, emi ekenode enye aka koro enye ọkọkworode abana Jesus, enye ama okop onyũ okut ata ediwak ikpọ utibe-ńkpọ. Ọbọ̀n ama owut enye mme ńkpọ emi editibede ke ini iso.

Ke ukpep-ńkpọ emi nnyin ikpep ite ke John ama okop akwa Hallelujah chorus ke Heaven, mmọ emi Ọbọ̀n akafakde, emi onyũ edi ikwọ emi mmọ ekekwođe: “Hallelujah; Erinyaña, ye ubọ̀n, ye ukeme enyene Abasi nnyin: koro mme ikpe Esie edi ata akpanikọ enyũ enen.” Ke ini akwa udim emi ema ekesim million ye million ekekwođe uyom eketie nte akwa mbufut ye nte ọkpọsọ̀n obuma: “Hallelujah; koro Ọbọ̀n Abasi nnyin, Andikara kpukpru ńkpọ, ada ubọ̀n. Eyak nnyin idara inyũ idat esit, inyũ inọ Enye ubọ̀n; koro ekem ini ndọ Eyen-erọ̀n, Ẹwan Esie otim idem ebeñe Enye.”

Ekese ini nditọ Abasi edian uyo ọtọ kiet ke ekwođe itoro enọ Abasi ke ufọk-Abasi, edi chorus heaven emi eyekpon onyũ enyene ubọ̀n akan chorus ekededi akanam nnyin ikopde.

Eketie ukem-ukem nte ńkpọ emi ekefuhorede ikpehe ndien John ama ekeme ndikut ńkpọ ńka anyan nduk ke ini iso, ke ini Jesus Christ edisobode ye Ẹwan Esie, mme andikan emi ema eketim ebeñe idem mmọ. Nnyin ikot ite: “Se enyin mikekwe, utọ̀n mikonyũ ikopke, Se minyũ idukke owo ke esit ndikere, Ẹkpọ ekededi eke Abasi ekebeñede onim ọnọ mmọ emi emade Enye” (1 Ẹwed Corinth 2:9). Ke akwa Udia-Ndọ emi, edi Jesus ke Idem Esie edinam ńkpọ inọ ikot Esie.

## Ini Ke Ekpere

Ekewet ńkpọ emi ke ńkpọ nte tọsin isua iba (2000) emi ekebede; edi mfin emi, nte nnyin ikpepde Ikọ Abasi, nnyin imokut ite ke idibighike aba ika iso, edi “ini ke ekpere” (Eriyarare 1:3). Ke ifiokde emi, eyak nnyin ikpep ukpep-ńkpọ emi ye ekikere ke esit nnyin nte ke mme ikọ emi edi ke ufọn nnyin, emi idighe ikpuikpu ńkukut ke John okokut, edi ekedi etop emi akpanade nnyin iduñore esit nnyin man ikut ite ke imebeñe idem.

## Ẹwan-Ndọ Christ

John ewet ete ke ekesine Ẹwan-ndọ Christ ediye linen, eke asanade onyũ esemde, onyũ anam ańwaña ete ke oro edi “Edinen ido nti ikot Abasi,” emi adade ọnọ esit eke eyetde enyũ enamde asana.

Ke ukpep-ńkpọ emi nnyin imọñọ itim ikpep ibaña erinyaña nsio ke idiok-ńkpọ; ndien ke oro ebede, iyak uwem nnyin inọ Abasi inyũ iyom edinam-asana ye uduok-mmọ̀n Edisana Spirit. Nnyin ima ikpep ite ke esiode edisana-ido efep, baba owo kiet idikwe Ọbọ̀n, nnyin ima ikpep ite ke nsuhọ “aran,” me Spirit Abasi, edi akpan ńkpọ ke ndinam utuenikañ nnyin asak tutu Ọdọ-ndọ edi.

## Editọ̀nọ Ntak Ndi Jesus

Edifiak ndi Jesus edi ke ikpehe iba, oro edi, Enye ndidi nte inọ ke okoneyo ndida Ẹwan-ndọ emi etiede ebet Enye nnyọ̀n, ke oro ebede, Udia ndọ Eyen-erọ̀n adiana, ke oro ebede ńko, eyarare edidi Jesus, emi kpukpru enyin owo edikutde Enye.

John etiñ nte edidi emi editiede ke Eriyarare 19 tọñode ke ufañ 11 osim 16. Eyak nnyin idomo ndikut ndise emi nte emende ewut mi. Ke akpa ifet enye okut nte eberede Heaven ndien afia enañ mbakara ọworo ada; andidoro enañ emi ke edem edi Jesus Christ, emi enyin Esie ebietde edeme-ikañ Enye onyũ ayara ediwak anyanya ke ibuot. Ema enyũ edebi edisine-ńkpọ Esie ke iyip, enyiñ Esie onyũ ekere “Ikọ Abasi.” Enye onyũ enyene enyiñ ke ọfọ̀n-idem ye ke ifuhi Esie, “EDIDEM NDIDEM YE ỌBỌŃ MBỌŃ.” O, nso utọ ndise!

Edisop ofut ama ọworo Enye ke inua, man Enye ada ekpeñe onyũ owot mme idut, Enye eyenyũ akara ke esañ ukwak. Enye eyekeme ndikut ñkpọ ke enyin eke esakde nte ikañ onyũ osobo kpukpru se idide idiok-ñkpọ onyũ edide edidehe.

### **Ndisana Owo Ke Mfia Enañ-Mbakara**

“Ndien udim ekọñ emi edude ke heaven edoro ke mfia enañ-mbakara etiene Enye ke edem, mmọ esine ediye linen emi afiade onyũ asanade.” Oro ikpedighe mbio efen ke ebede ndisana owo, Ñwan-ndọ emi ema ekesiak ke ufañ itiaba. Baba owo kiet eke esit misanake idinyeneke udeme. Ñwan-ndọ “otim idem ebeñe Enye.” Nnyin imọfiok ite ke eda iyip Jesus enyaña enyũ eyet nnyin isana, edi ñkpọ odu emi anade nnyin inam. Ana nte nnyin ibọ uduok-mmọñ Edisana Spirit, ñko. Ndien nnyin inyene ndikpeme, mbọñ akam, nnyũ ñkot Ikọ Abasi, ida ifet ekededi eke ikutde iduk mme mbono, ikọ mme ukpọñ inọ Jesus, ayak nnyin iyak uwem nnyin ofuri ofuri inọ Abasi kpukpru usen. Ekuyak nnyin ikpañ ubok itie inyũ idọhọ ite, “Ema enyaña mi, ema eyet esit mi asana; mmenyene uduok-mmọñ, mmebeñe-idem mbaña edidi Jesus, ñkpọ inyũ iduhe aba inọ mi ndinam.”

### **Asua-Christ**

Nnyin ima ikpep ke Ọyọhọ Ukpep-Ñkpọ 462 ibaña unam oro ekenyũ ediọñode nte Asua-Christ. John etiñ abaña unam emi ye ndiọi ndidem isọñ nte esopde idem ọtọ kiet ndiñwana ekọñ ye Ọbọñ ye Edidem ndidem ye mbon ekọñ Esie. Edi nnyin imọfiok enye emi akakande ke ekọñ oro, Ada-usuñ erinyaña nnyin! Nnyin imokot ke 2 Ñwed Thessalonica 2:8 nte ke “abiat-ibet oro, . . . ibifik inua Esie owot enye, onyũ ada eriyarare eridi Esie osobo enye.” Enye ama emen unam oro ye anditiñ ntiñ-nnim ikọ nsu ọduok ye uwem ke inyañ ikañ emi asakde ye brimstone, itie nsinsi ndutuhọ, koro ikañ oro mmidinimeke, owo inyũ ifọbọke ikpa. Enye eyebọ ufen odu uwem mkpa.

### **Ofut**

Ema ewot mme udim ekọñ unam oro ye eke anditiñ ntiñ-nnim ikọ nsu ke ofut emi okotode ke inua Christ emi okodorode ke afia enañ-mbakara. Ke ediwak itie ke ikọ Abasi, ekot Edisana Ñwed Abasi “ofut.” Jesus ama ọdọhọ ete, “Ikọ eke ñketañde, kpa ikọ oro edibiere ikpe ọnọ enye ke akpatre usen” (John 12:48). Ke Mme Hebrew 4:12 nnyin Ikot ite ke Ikọ Abasi “ọsọp akan kpukpru ofut iso iba” enye onyũ enyene odudu ekem ndiduñore ekikere ye uduak nnyin. John ama ọdọhọ ete ke “edisop ofut iso iba” ama oto ke inua Jesus ọworo. Ofut emi ada ọnọ Ikọ Abasi emi edidade ebire ikpe enọ owo. Jesus eyeda “ofut” oro “ekpeñe mme idut.”

### **Usoro Akwa Abasi**

Ñkpọ mkpaidem efen emi John okokutde ekedi angel emi akadade ke utin onyũ ofioride ke ọkpọsọñ uyo okot kpukpru inuen eke efede ke enyọñ ete, “Edi ediboho ọtọ kiet man edia akamba udia Abasi, man eta obuk ndidem, ye obuk mme etubom-ekọñ, ye obuk mkpọsọñ owo, ye obuk enañ-mbakara, ye eke mme andidoro mmọ ke edem, ye obuk kpukpru owo, nditọ ye ifin, ñkpri ye ikpọ.” Nso utọ usoro, ke ini kpukpru utere, ekọñ ebuk eyop, inuen inyañ, nsañkot, ñkukwọ-inọ, ntrukupom ye kpukpru oruk inuen emi etode ke ofuri ererimbot ediboho ke itie kiet ndita obuk ndiọi owo emi ekeñwanade ye Christ ndien ekan mmọ!

### **“EDIDEM NDIDEM YE ỌBỌÑ MBỌÑ”**

Edidem ndidem ama akan odudu Satan! Nte edi ñkpọ mkpaidem ke mbiowo oro ndiduo ke isọñ ntuak ibuot nnọ Enye? Nte edi ñkpọ mkpaidem ke akwa udim mbọñ Heaven ekekwođe “Hallelujah” enọ Ọbọñ mbọñ? Oh, nte kpukpru owo ke kpukpru ebiet ekpeduñode ke iso Esie idahemi enyũ ayak uwem mmọ enọ Enye enyũ ediana ye mmọ eke etuakde ibuot enọ akwa Edidem emi.

Nte afo amayara Enye anyanya nte Edidem ke uwem fo? Nte afo ọmọnọ Enye ukpono ke kpukpru se afo anamde onyũ etiñde? Nte afo edi eyen Edidem oro?

### **MME MBUME**

- 1 Nso ikwọ ke ekekwo ke Heaven?
- 2 Udia-ndọ, ndọ Eyen-erọñ ọworo nso?
- 3 Didie ke Ñwan-ndọ esine edisine-ñkpọ?
- 4 Emi akada ọnọ nso?

- 5 Tiñ nte Edidem emi akawatde ke afia enañ-mbakara eketiede.
- 6 Nso ikedi edisine-ñkpọ mmọ emi eketienede Enye ke mfia enañ-mbakara?
- 7 Nso etop ke angel oro akadade ke utin ọkọn?
- 8 Ndidem isọñ ye udim ekọñ mmọ ekeñwana ekọñ ye anie?
- 9 Ofut oro ọkọwọrọde ke inua Christ akada ọnọ nso?
- 10 Nso ntọt edu ke ibuot ñwed emi ọnọ nnyin?